

## **PREMIOS CATEGORÍA A**

### **PRIMEIRO PREMIO**

**Xiana Costa González (5º EP)**  
CEIP Carlos Casares de Vilariño

#### **Diversión**

Penso en bailar,  
cantar, xogar...  
venme música á cabeza.

Quero rir, correr,  
saltar...  
sentirme libre coma o vento.

### **SEGUNDO PREMIO**

**Mateo Porto Covelo (6º EP)**  
CEIP Carlos Casares de Vilariño

#### **Follas de Mil Cores**

Gústanme as follas,  
de mil cores ou máis.  
Gústame o outono,  
só iso e nada máis.

Só iso e nada máis,  
saio para o meu xardín,  
miro o ceo de outono  
e os paxaros cantan para min.

## **MENCIONS DO XURADO**

Pola súa calidade, recoméndase a publicación dos seguintes poemas:

### **Antía Gómez Cameselle(6º EP)**

CEIP Chano Piñeiro

#### **Non fixen o poema**

É a hora do almorzo  
Acórdome de que teño que facer un poema.  
Chega a hora do xantar.  
Aínda non fixen o poema

Teño que facer un poema  
E xa é a hora da cea.  
Levántome o luns pola mañá,  
acórdome de que teño que facer un poema.

### **Yaiza Diéguez Chamorro (6º EP)**

CEIP Chano Piñeiro

#### **O significado da música**

Non sei o significado da música.  
O único que sei  
é que se toco o piano  
póñense os pelos de punta.  
Cando estudo a canción  
todo me sae moito mellor,  
alégraseme o día  
amplíase o corazón.

**Xiana Costa González (5º EP)**  
CEIP Carlos Casares de Vilariño

### **A primavera**

Xa chegou a primavera,  
Con cheiro no ar.  
Cantan os paxaros,  
Teño ganas de bailar.

Xa chegou a primavera,  
Corre a auga pola fonte  
e mais a natureza polo monte.  
Cantan os peixes na lagoa.

**Laura Burgo Rosendo (6º EP)**  
CEIP Carlos Casares de Vilariño

### **Pesadelos**

Non podo durmir.  
Hai algo que me tortura.  
Ten unha mensaxe para min,  
mais non a logro descubrir.

## **PREMIOS CATEGORÍA B**

### **PRIMEIRO PREMIO**

**Luna Pérez Castro. (1º ESO)**

CPI Plurilingüe Arquitecto Palacios, Panxón

#### **A túa alma**

O ceo está escuro

e silandeiro.

Rúas baleiras.

Non queda ninguén.

Nin un rastro,

nin un alento.

Só queda a túa alma,

nesas rúas desertas.

### **SEGUNDO PREMIO**

**Brezo Vereá Nieto (1º ESO)**

IES Terra de Turonio

Eu prefiro ser a nena  
que corre por estas lombas  
que monta no seu cabalo  
que chora se a provocan.

Eu non quero ser princesa  
quero ser unha amazona  
quero xogar coas amigas (amigos, amigues)  
quero voar coas gaivotas.

## MENCIÓNS DO XURADO

Pola súa calidade, recoméndase a publicación dos seguintes poemas:

### **Elena Taboada Fernández (1º ESO)**

IES Escolas Proval

#### **Mentres o sol**

Mentres o sol vai durmir  
eu penso en soños negros,  
negros como as feridas  
das mulleres atrapadas.

### **Adriana Grandal Alonso (1º ESO)**

IES Escolas Proval

#### **A chuvia**

Ese silencio  
tanta tranquilidade  
incomprendida.

### **Inés Román Martínez (1º ESO)**

CPI Plurilingüe Arquitecto Palacios, Panxón

#### **Ós que non están**

Busco a túa sombra nos días de sol.  
Por favor, volve,  
grito polas noites  
con dor.

Dende que te fuches  
son alguén sen cor,  
porque ti me pintabas,  
pintabas o meu corazón.

**Mateo Lamas Muradás (1º ESO)**

CPI Plurilingüe Arquitecto Palacios, Panxón

**Galega**

Bule, corre, choia;  
non ten acougo,  
nin dentro nin fóra.

Non descansa  
nin unha hora.

Na casa, no choio;  
no campo, cos fillos.  
Nunca deixa de traballar.

**Alejandra Carreira Mouriño (1º ESO)**

CPI Plurilingüe Arquitecto Palacios, Panxón

**Plenitude**

Ríos, lagos e mares  
vou asucando co meu barco.  
Sigo o meu camiño  
contemplando as estrelas.  
Sen saber a onde vou  
encontro o meu soño.  
O mar dáme a vida  
que antes non tiña.

**Tania Pereira Montoya (3º ESO)**

IES Escolas Proval

**Aturuxo**

Aturuxamos con forza  
para que escoite a xente  
que queremos igualdade  
para homes e mulleres.

## **PREMIOS CATEGORÍA C**

### PRIMEIRO PREMIO

**María Baqueiro Leyenda (2º Bacharelato)**

IES Primeiro de Marzo

#### **África convértese**

África convértese  
en anel para as mulleres que bailan;  
en xoguete para os nenos que rin;  
en alimento para os que sofren;  
en futuro para o que soña;  
en estupor para o que visita.  
Lugar de caos e de perfecta harmonía.  
Remuíño e quietude fusionados.

### SEGUNDO PREMIO

**Marta Fernández Lestayo (2º Bacharelato)**

IES Primeiro de Marzo

#### **Mágoa**

Unha vez chorei  
chorei tanto,  
que as miñas bágoas  
saíron do meu corpo ata chegar ao teu.  
Unha vez chorei,  
por ti.  
Mais ti xa non estabas  
e agora xa non estou eu.

## **MENCIÓN DO XURADO**

Pola súa calidade, recoméndase a publicación dos seguintes poemas:

### **María Baqueiro Leyenda (2º Bacharelato)**

IES Primeiro de Marzo

#### **Engaiolada**

Engaiolada en eternas soidades,  
baixo a tenue brisa da sabana  
do críptico continente africano.  
Sempre asoballa algo novo de África,  
entre o lóstrego e o trono,  
lugar no que todo cambia rapidamente  
como a materia que nos rodea,  
mais mantense nunha perpetuación inalterábel.

#### **En África**

En África cada home pertence a unha tribo,  
cada un observa a súa propia sombra transparente  
axexando aos seus perpetuos rivais,  
sempre alerta, eterna vixilancia.  
A natureza abafadora que os rodea  
danza acorde coa usanza dos autóctonos;  
convive, pura, casta, inexplorada, inalterable,  
impenetrable.



**Víctor Abelleira Silva (2º Bacharelato)**

IES Primeiro de Marzo

### **Non sei**

Non sei se son consciente,  
de como está actualmente a miña mente.  
Tampouco creo selo  
de como moitas veces mente,  
e se mostra opaca,  
como contraria a transparente.  
E ás veces crea unha pegada permanente,  
que quizais non se borre  
nin con quita esmalte, unllas ou dentes.

### **Dóenme**

Dóenme.  
Todos e cada un dos factores, palabras,  
sentimentos, accións e pensamentos.  
Cada un dos puntos e comas,  
e as frases que nunca cheguei a entender.  
Presinto que os pequenos detalles e demais  
non volverán aparecer,  
endexamais.